

Bilten

www.tuzilastvobih.gov.ba

Tužilaštvo-Tužiteljstvo Bosne i Hercegovine

Sarajevo • juni/lipanj 2014. • broj 4



Venecijanska komisija i Evropska unija podržali nezavisnost pravosudnih institucija Bosne i Hercegovine



Потписан Протокол о сарадњи Тужилаштва БиХ и Врховног државног тужилаштва Црне Горе



Saradnja Tužilaštva BiH i Uprave za indirektno oporezivanje. Odlučni koraci za krivično gonjenje počilaca višemilionskih utaja i neplaćanja poreza



Riječ glavnog tužioca

Poštovani,

u 2014. godini Tužilaštvo BiH je značajno kadrovski ojačano sa novim tužiocima i uložiti će maksimalne napore kako bi rezultati našeg rada bili još bolji.

Mogu najaviti da će se u ovoj godini intenzivirati aktivnosti u borbi protiv korupcije i finansijskog kriminala, kao oblika krivičnih djela kojima se nanosi direktna šteta svim građanima Bosne i Hercegovine.

Tužilaštvo BiH će također nastaviti intenzivne aktivnosti u procesuiranju predmeta ratnih zločina i organiziranog kriminala, te jačati regionalnu saradnju koja je preduslov za efikasnu borbu protiv međunarodnih oblika kriminala, sa kojima se sve češće susrećemo u radu na predmetima.

U ovoj godini, intenzivirana je direktna saradnja između Tužilaštva BiH i Uprave za indirektno oporezivanje (UIO) BiH, radi što efikasnijeg rada na predmetima poreznih utaja i carinskih prevara.

Određeni su specijalizirani stručnjaci iz UIO, koji zajedno sa tužiocima iz Odsjeka za privredni kriminal Tužilaštva BiH, gotovo svakodnevno i kontinuirano održavaju kontakte i dogovaraju aktivnosti koje su potrebne da se što brže i efikasnije otkrivaju i krivično procesuiraju fizičke i pravne osobe koje čine porezne utaje i carinske prevare, što su vrlo ozbiljna krivična djela jer nanose štetu ekonomskom sistemu i svim građanima naše zemlje.

Jačanje kapaciteta u Posebnom odjelu za ratne zločine, povećanje broja tužilaca i stručnih saradnika nam je značajno pomoglo u planiranju efikasnije i brže dinamike za rad na predmetima, tako da građani u ovoj godini mogu očekivati povećanje broja optužnica za ratne zločine, intenziviranje istraga, provođenje procesa ekshumacija i identifikacija nestalih osoba, te konačno i sudski epilog mnogih zločina na čije procesuiranje porodice žrtava čekaju već dvije decenije.

Sada, kada imamo veći broj tužilaca i stručnog osoblja, možemo postići bolje rezultate u radu na svim predmetima u nadležnosti Tužilaštva BiH, i to će se svakako desiti.

Intenzivno nastavljamo borbu protiv korupcije. Građani su putem medija već mogli vidjeti provođenje akcija na otkrivanju počinitelja koruptivnih krivičnih dje-



la. Takođe se intenzivno nastavljaju i združene akcije koje policijski službenici iz više agencija, često njih više desetina ili stotina u okviru jedne akcije, koordinirano provode na terenu po nalogu tužilaca, a sa ciljem borbe protiv organiziranog kriminala i krivičnih djela koja se odnose na krijumčarenje ljudi, neovlašten međunarodni promet opojnih droga i druga teška krivična djela koja ugrožavaju sigurnosnu situaciju u našoj zemlji.

U ovoj godini nastavljamo jačanje saradnje sa svim policijskim agencijama koje sarađuju sa Tužilaštvom BiH u radu na predmetima, a jačat ćemo i regionalnu saradnju s obzirom na sve češće pojave međunarodnog kriminala i potrebu efikasnije borbe protiv organiziranih kriminalnih grupa koje djeluju u više zemalja regiona.

Zajedno sa partnerskim agencijama i institucijama nastavljamo borbu protiv svih oblika kriminala čije je procesuiranje u nadležnosti Tužilaštva BiH, a sve s ciljem veće sigurnosti svih građana naše zemlje, kao i građana regiona, a u svjetlu predstojećih evropskih integracija.

S poštovanjem,

Goran Salihović
Glavni tužilac

Одржан састанак главног тужиоца и директора УИО БиХ



Главни тужилац Туžилаштва БиХ Горан Салиховић и директор Управе за индиректно опорезивање БиХ Миро Џакула, одржали су састанак на којем су договорене конкретне активности на формирању специјалног тима, по угледу на рад УСКОК-а у Републици Хрватској.

На састанку је одређен тим од 8 специјализованих запосленика УИО БиХ, као и координатор тима, који ће заједно са руководиоцем Посебног одјела за организовани криминал, привредни криминал и корупцију и тужиоцима из Одсјека за привредни криминал Туžилаштва БиХ, радити на откривању и кривичном процесуирању учинилаца пореских утаја и неплаћања пореза.

На овај начин, радећи по модалитету УСКОК-а у Републици Хрватској, биће омогућена ефикаснија борба против пореских утаја којима се наноси штета буџету БиХ и свим грађанима Босне и Херцеговине.

Тим запосленика УИО БиХ ће у сталном контакту са тужиоцима Туžилаштва БиХ директно и свакодневно сарађивати у истрагама усмјереним на откривање пореских утаја. Обје институције су одредиле службенике за заједнички рад, који имају велико искуство у процесуирању кривичних дјела из области финансијског и привредног криминала. Они ће проводити активности на откривању и кажњавању пореских утаја, као и активности поврата утајеног пореза у буџет Босне и Херцеговине.

Господин Џакула је информисао главног тужиоца да ће УИО ускоро Туžилаштву БиХ доставити обиман извјештај који је Туžилаштво тражило, а односи се на предузећа и пореске обвезнике који држави дугују око 296 милиона КМ. Они ће договорити даље активности на процесуирању физичких и правних лица за која постоје докази да су учинили кривично дјело.

Интензивна сарадња Туžилаштва БиХ и УИО БиХ ће се наставити у будућности ради откривања и кривичног гоњења учинилаца пореских утаја и поврата утајеног новца у буџет Босне и Херцеговине. ■



Strukture Europske unije podržale neovisnost pravosuđa

Tijekom održavanja sastanka strukturiranog dijaloga u Briselu, institucije Europske unije su podržale stavove Venecijanskog povjerenstva vezane za neovisnost pravosuđa, neovisan izbor tužitelja, kao i sprječavanje političkog utjecaja na rad tužitelja i pravosuđa.

Tužiteljstvo BiH pozdravlja ove stavove, te poručuje građanima Bosne i Hercegovine da nastavlja svoj rad na procesuiranju predmeta ratnih zločina, organiziranog kriminala i korupcije, sa ciljem uspostave vladavine prava u Bosni i Hercegovini kao ključnog segmenta u procesu europskih integracija naše zemlje.

Također, vrlo pozitivan pomak su i ocjene Europskog povjerenstva, kojima se podržava rad Tužiteljstva BiH, regionalna suradnja tužiteljstava i uspostava vladavine prava u Bosni i Hercegovini. ■



■ Tematska sjednica strukturiranog dijaloga



■ Potpisivanje Protokola između BiH i CG

Intervju

Brisel

Na pitanje o stavovima Venecijanske komisije, koja je u preporukama podržala nezavisnost pravosuđa od političke kontrole i uticaja kao i važnosti ovih preporuka, glavni tužilac je odgovorio:

Goran Salihović: Ima dosta koristi. Najveća korist je što smo čuli stav Venecijanske komisije da je ostala pri svojim stavovima iz 2012. godine, a Evropska komisija je dala punu podršku Venecijanskoj komisiji u istraivanju u pogledu standarda za pravosuđe. Ovo je izuzetno dobra stvar za bh. pravosuđe.

BHT1: Šta su to standardi, šta su to stavovi Venecijanske komisije?

Goran Salihović: Standardi Venecijanske komisije su, što se tiče Zakona o Visokom sudskom i tužilačkom vijeću, da se mora očuvati profesionalnost, nezavisnost i nepristrasnost, da se mora očuvati i ekonomska, odnosno finansijska nezavisnost sudija i tužilaca, da njihov izbor mora biti nezavisan i da politika ne može imati upliv u to. Sve su to stavovi za koje se mi cijelo vrijeme borimo.

BHT1: Čuli smo s druge strane da politika, nažalost, ima žestok upliv u svemu. Koliko vi sa svoje strane možete učiniti da spriječite taj negativan uticaj?

Goran Salihović: Mi ne možemo u potpunosti spriječiti taj negativan uticaj. Jedino možemo spriječiti našim radom i rezultatima. U tom smislu smo i dobili pomoć od Evropske komisije, odnosno IPA fondova. Dobili smo pomoć i od naše Vlade sa novim brojem tužilaca i to će sigurno dati bolje rezultate rada. Ali, ova podrška mora biti trajna zato što pravosudna reforma traje i nikada nije završena.

BHT1: Čuli smo da je trenutno jedan od problema u Bosni i Hercegovini nedovoljan broj tužilaca, ne-



dovoljan broj onih koji bi trebali da lociraju problem i da ga dovedu pred pravosudne organe. Kako riješiti takvo nešto?

Goran Salihović: Mislim da država mora imati razumijevanja da pojača kapacitete kao što je pojačala kapacitete u Tužilaštvu Bosne i Hercegovine, mora pojačati entitetska tužilaštva. Mi očekujemo kroz projekat IPA 2 da se potpiše Sporazum i da krenemo u realizaciju tog projekta kroz koji ćemo dobiti određen broj tužilaca za procesuiranje predmeta korupcije. Znači, svi pričamo o korupciji, ali mi na terenu jednostavno nemamo ljudi. U regiji je 7.000 građana na jednog tužioca, a kod nas je 15.000 građana na jednog tužioca. Znači da nešto nije bilo dobro u procjeni u toj reformi. Mi kroz ove pregovore sa Evropskom komisijom i stavove Venecijanske komisije dobijamo mnogo i približavamo se standardima koje želi Evropska unija.

BHT1: Pojasnite mi, kao laiku, kako razbiti taj začarani krug? Kažete da je neosporan uticaj politike na rad, vaš rad prije svega. Kako dovesti pred sud nekoga ko je u politici, a postoje čvrsti dokazi da je umiješan u korupciju, da je učesnik korupcije, da je dio tog koruptivnog lanca?

Goran Salihović: Vidite, uopšte nije problem nekoga dovesti pred lice pravde i mi nemamo pritisak od strane politike na svoj rad. Ali je moje mišljenje i mišljenje mojih kolega da nikome ne možemo nešto pako-

vati, namjestiti, i ja sam protivnik toga.

BHT1: Bilo je takvih slučajeva, je li?

Goran Salihović: Ja ne znam da li je bilo, kod mene nije. Ja sam zagovornik da procesuiramo ono što imamo i tu će svi biti jednaki pred zakonom. Ono što cijelo vrijeme govorim je da nema nedodirljivih, tako da mi tu nemamo problem. Taj eventualni politički uticaj se proteže kroz donošenje ovakvih zakona, koji nisu u standardu sa evropskim standardima pravosuđa. To su pokušaji i tu je najveći pritisak koji pravosuđe osjeti, to je finansijski pritisak. Znači, ne daju se sredstva za normalno funkcionisanje određenih institucija pravosuđa i to ide nekako sporo. Ja potpuno razumijem da smo mi u jednoj teškoj situaciji, ali ako želimo obračun s korupcijom, moramo više uložiti u pravosuđe.

BHT1: Čini mi se da ukupna atmosfera u našem društvu nije atmosfera koja je voljna i spremna da se prvo bori protiv korupcije, da na neki način, čini mi se potpuno pogrešno, mi tu neku korupciju, počev od sitnih svakodnevnih životnih detalja smatramo dijelom folklora, što je apsolutno pogrešno.

Goran Salihović: U pravu ste. Ljudi se veoma teško odlučuju da sarađuju i da prijavljuju korupciju. Međutim, mi u zadnje vrijeme imamo ogroman korupcijski predmet Keke-

rović, gdje su faktički oduzete 32.000 KM imovine, zamrznuta imovina, i imamo još u nekoj fazi ovaj zadnji predmet Gavran. Tako da predmete za koje se Sud oglašio nenadležnim, kao Budimir, kao ovaj poslanik, spuštamo na niže nivoe, a mi ćemo raditi sve što nam dođe pod ruku. Isto tako, ti predmeti će biti pripremljeni i za entitetski nivo.

BHT1: Da li vjerujete, da li se nadate da će jednog dana kada Bosna i Hercegovina sjedne za stol sa evropskim partnerima da pregovara o konačnom prijemu u Evropsku uniju, da će tada s nas biti skinut taj epitet zemlje u kojoj vlada korupcija?

Goran Salihović: Vidite, ja se ne bih baš složio da je to samo slučaj u Bosni i Hercegovini. U čitavoj regiji, u čitavoj Evropi ima korupcije. Imate primjer u okruženju gdje je to još i više izraženo. Ja se nadam da će naše vlasti imati razumijevanja i što prije ići ka Evropskoj uniji zato što pripadamo tamo. Mi smo jedan segment koji možda ide malo ispred i moramo imati pomoć u tome, to je naš doprinos da Bosna i Hercegovina ide ka Evropskoj uniji.

Ako želimo u obračun s korupcijom, moramo uložiti u sudove i u tužilaštva. To je jedini način. A što se tiče naše profesije, budite sigurni da smo mi spremni, da to možemo i da nismo ničiji.

Ja mislim da građani moraju vjerovati u pravosuđe Bosne i Hercegovine, mada pravosuđe Bosne i Hercegovine ima dosta mana i nekih stvari koje treba ispraviti, recimo način izbora u Visokom sudskom i tužilačkom vijeću mora biti demokratski. Ja sam za to da člana vijeća biraju sve sudije i tužioci, to je najdemokratičnije.

BHT1: Sastanci poput ovog današnjeg bi trebali pomoći u tom smislu?

Goran Salihović: Venecijanska komisija je tome dala izuzetno dobar ton. Napravila je analizu ovog predloženog Zakona, ponovila je stavove, dala je nove stavove koji idu u korist nezavisnom pravosuđu. ■



Glavni tužitelj se sastao sa novoimenovanim tužiteljima u Tužiteljstvo BiH

Nakon imenovanja novih tužitelja u Tužiteljstvo BiH, koji su sa radom počeli 15. 03. 2014. godine, glavni tužitelj Goran Salihović se sastao sa novoimenovanim kolegama te im zaželio dobrodošlicu.

Glavni tužitelj je nove kolege upoznao sa unutarnjim ustrojem institucije, te planiranom dinamikom i načinom rada u Tužiteljstvu BiH, kao i prioritetnim aktivnostima u budućnosti.

Nakon nedavnog imenovanja koje je izvršeno u VSTV-u BiH, tužitelji koji dolaze iz različitih krajeva Bosne i Hercegovine su raspoređeni u odjele i odsjeke Tužiteljstva BiH, gdje će im biti raspoređeni predmeti u kojima će postupati u narednom razdoblju.

Najnovijim povećanjem broja tužitelja značajno su ojačani kapaciteti Tužiteljstva BiH. ■



Zajednička suradnja u procesuiranju ratnih zločina središnje teme bilateralnog sastanka glavnih tužitelja



U Tužiteljstvu BiH održan je sastanak glavnog tužitelja Tužiteljstva BiH, Gorana Salihovića i glavnog tužioca Tužilaštva za ratne zločine Srbije, Vladimira Vukčevića, na kojem su nazočili i tužitelji i dužnosnici oba tužiteljstva, te predstavnici MUP-a Srbije, uključeni u istrage u predmetima ratnih zločina.

Na sastanku je razgovarano o nedavno realiziranim aktivnostima zajedničkog tima na otkrivanju i procesuiranju počinitelja ratnog zločina u Štrpcima 1993. godine, te značajnim pomacima ostvarenim u ovom predmetu na kojem intenzivno radi Tužilaštvo u Beogradu.

Zajednički tim je u proteklom razdoblju ostvario niz aktivnosti koje su ocijenjene kao vrlo uspješne.

Tijekom sastanka je razgovarano i o aktivnostima u svezi s pronalaskom svjedoka ratnih zločina, koji se nalaze na teritoriju Bosne i Hercegovine i Srbije, te realiziranju njihovog svjedočenja u predmetima koji se vode u Tužiteljstvu BiH i Tužilaštvu za ratne zločine Srbije, putem video-linka ili na druge zakonom predviđene načine.

Jedna od tema sastanka se odnosila i na predmete ratnih zločina na području Srebrenice i drugih lokaliteta, u kojima Tužilaštvo u Beogradu pruža značajnu pomoć i asistenciju Tužiteljstvu BiH u pogledu osumnjičenih i optuženih osoba koje se nalaze na području Republike Srbije.

Glavni tužitelj Salihović je upoznao kolege iz Beograda da će Tužiteljstvo BiH uskoro podići optužnicu protiv više osoba za ratne zločine počinjene nad žrtvama srpske nacionalnosti u okolici Sarajeva, gdje je stradalo više desetina žrtava srpske nacionalnosti svih starosnih skupina, među kojima su i djeca i starci, a dio obitelji žrtava je raseljen u BiH i Srbiji.

Također, kolege iz Beograda su upoznate da je Tužiteljstvo BiH na pomolu rješavanja jednog predmeta stradanja žrtava srpske nacionalnosti, na samom početku rata u BiH, a čije se obitelji dijelom nalaze na području Srbije, u kojem je ostvarena značajna suradnja sa Tužilaštvom u Beogradu.

Zbog zaštite interesa istrage i rada na predmetima tužiteljstva ne mogu javnosti u ovom trenutku dati više detalja o navedenim predmetima.

Predmeti za ratne zločine u Višegradu i okolici često se odnose na iste osobe koje su u ratnom razdoblju bile nazočne na tom prostoru, a Tužilaštvo u Beogradu radi na predmetima ratnog zločina u Štrpcima i Sjeverinu, gdje su žrtve državljani Srbije, te je potrebna intenzivna i dugoročna suradnja tužiteljstava u procesuiranju ovih predmeta.

Na sastanku je razgovarano i o suradnji u drugim predmetima ratnih zločina na kojima je započeta suradnja, kao i predmetima na kojima će suradnja započeti u bliskoj budućnosti, a radi se o predmetima gdje

počina i konkretne aktivnosti na predmetima – tužitelja Salihovića i Vukčevića

se počinitelji ili žrtve nalaze na teritoriju Bosne i Hercegovine i Srbije.

Tijekom sastanka dogovoreni su i konkretni koraci u budućnosti, a detalji aktivnosti ne mogu biti priopćeni javnosti zbog zaštite interesa istrage.

Također, dogovoreno je da će se sastanci dužnosnika dvaju tužiteljstava i rad na terenu nastaviti i u budućnosti sa sve većim intenzitetom, koji zahtijeva rad na predmetima.

Tužiteljstvo BiH i Tužilaštvo za ratne zločine Republike Srbije nastavljaju intenzivnu suradnju na procesuiranju predmeta ratnih zločina u budućnosti, a sve u interesu uspostave vladavine prava, procesuiranja počinitelja ratnih zločina i stvaranja sigurnijeg okruženja za život svih građana BiH i Srbije u predstojećem procesu europskih integracija. ■



Potpisan Protokol o saradnji između tužilaštava BiH i Crne Gore

U Briselu je dana 29. 04. 2014. godine potpisan Protokol o saradnji u gonjenju učinilaca krivičnih djela ratnih zločina, zločina protiv čovječnosti i genocida između Tužilaštva BiH i Vrhovnog državnog tužilaštva Crne Gore.

Protokol su potpisali glavni tužilac Tužilaštva BiH Goran Salihović i v.d. vrhovnog državnog tužioca Crne Gore Veselin Vučković.

Ovim protokolom se omogućava direktna saradnja u procesuiranju predmeta ratnih zločina, kakva već postoji između tužilaštava u BiH, Srbiji i Hrvatskoj, a s ciljem da se onemoguću osumnjičenima za ratne zločine da se, zbog državljanstva i boravka u drugoj državi, skrivaju od procesuiranja.

U Posebnom odjelu za ratne zločine Tužilaštva BiH su u radu predmeti u kojima se došlo do informacija i saznanja da se određeni osumnjičeni počinio nalaze u Crnoj Gori.

Radi se o osumnjičenima koji su za vrijeme rata u BiH boravili na teritoriji Bosne i Hercegovine i čije će procesuiranje biti znatno ubrzano potpisivanjem protokola.

Na ovaj način bit će poboljšana i saradnja u procesuiranju predmeta ratnih zločina koji se vode u crnogorskom pravosuđu, a u kojima se svjedoci ili oštećeni nalaze na teritoriji Bosne i Hercegovine.

Potpisivanje Protokola o saradnji su podržale institucije Evropske unije i okarakterizirale kao značajan pomak u regionalnoj saradnji između pravosudnih institucija, te jedan od bitnih koraka strukturalnog dijaloga.

Tužilaštvo Bosne i Hercegovine nastavlja aktivnosti jačanja regionalne saradnje između tužilaštava, radi što efikasnijeg procesuiranja svih vrsta kriminala koji se izvršava na području više država, a radi očuvanja vladavine prava i stvaranja sigurnijeg okruženja na evropskom putu Bosne i Hercegovine. ■



■ Vladimir Vukčević, glavni tužilac Tužilaštva za ratne zločine Republike Srbije
Serge Brammertz, glavni tužilac Tužilaštva pri MKSJ u Den Haagu
Dinko Cvitan, glavni državni odvjetnik Republike Hrvatske
Goran Salihović, glavni tužilac Tužilaštva BiH



Na konferenciji na Brijunima, u svibnju 2014. godine, dogovarana je daljnja suradnja u procesuiranju ratnih zločina. Istaknuta je snažna potpora Tužiteljstva pri MKSJ upućena Tužiteljstvu BiH. Također, iskazana je snažna međusobna potpora između tužiteljstava zemalja regiona

Izvod iz zaključaka sa Regionalne konferencije tužitelja na Brijunima, svibanj 2014. godine.

1. Ponovo je potvrđeno postojanje volje za neposrednu suradnju, zbog čega je potrebno ostvarenje najvećeg mogućeg stupnja neposredne suradnje radi razmjene dokaza i informacija koje mogu doprinijeti otkrivanju počinitelja ratnih zločina.
2. Tijekom protekle godine ostvaren je značajan napredak zbog zaključivanja međusobnih sporazuma između tužiteljstava za postupanje u predmetima ratnih zločina.
3. Tužitelji se slažu da upravo ovi sporazumi pružaju još veće mogućnosti za neposrednu suradnju, te bržu i učinkovitiju razmjenu podataka i dokaza.
4. Sudionici su suglasni da projekat „Oficira za vezu“ predstavlja dodatnu vrijednost, budući da se rezultati projekta ogledaju u novim pokrenutim postupcima za ratne zločine i poboljšanju dokaznog fundusa postojećih predmeta.
5. Svi sudionici su suglasni da se mora nastaviti suradnja sa Rezidualnim mehanizmom (MICT). Naglašena je bitnost nastavka mogućnosti pristupanja bazi podataka MKSJ-a, budući da je neometan pristup dokumentima i dokazima nužan radi nastavka postupanja u predmetima ratnih zločina.
6. U tužiteljstvima u regiji je neophodno ažurirati podatke o tužiteljskim uredima i osobama u tužiteljskim uredima koje rade na predmetima ratnih zločina, kako bi se unaprijedila izravna i neposredna suradnja između osoba uključenih u rad na predmetima ratnih zločina. ■



Konferencija glavnih tužilaca u Tirani, Albanija, maj 2014. godine

S lijeva na desno:
- Gerhard Jarosch - predsjednik Međunarodnog udruženja tužilaca
- Adriatik Llalla - glavni tužilac Republike Albanije
- Goran Salihović - glavni tužilac Tužilaštva/Tužiteljstva BiH
- Eric Bisschop - zamjenik saveznog tužioca Kraljevine Belgije





Zvaničnici Tužilaštva BiH sastali su se sa Sergeom Brammertzom, glavnim tužiocem Tužilaštva MKSJ

Zamjenica rukovodioca Posebnog odjela za ratne zločine Gordana Tadić, rukovodilac Odsjeka II Posebnog odjela za ratne zločine i zamjenik glavnog tužioca Dragan Čorlija i rukovodilac Odsjeka 3/6 Posebnog odjela za ratne zločine Ibro Bulić, sastali su se sa glavnim tužiocem Tužilaštva MKSJ-a Sergeom Brammertzom i njegovim saradnicima.

Teme sastanka su se odnosile na zajedničku saradnju u procesuiranju predmeta ratnih zločina.

Centralna tema ovog sastanka je bilo izvještavanje o radu Tužilaštva BiH na preostalim predmetima kategorije II, u kojima su istrage započete do kraja 2003. godine u Tužilaštvu MKSJ-a, a dokazni ma-

terijali iz ovih predmeta ustupljeni Tužilaštvu BiH.

Tužilac Brammertz je razgovarao i sa postupajućim tužiocem u predmetima ratnih zločina na području općine Prijedor Izetom Odoševićem i njegovim saradnicima o najnovijim detaljima istrage o ratnim zločinima u ovoj općini, kao i o prikupljenim dokazima o posmrtnim ostacima iz masovne grobnice Tomašica.

Na sastanku je također razmotreno pitanje saradnje između tužilaštava u regionu i primjene nedavno potpisanih protokola o saradnji sa Republikom Srbijom i Republikom Hrvatskom, te je zaključeno da je postignut značajan napredak u procesuiranju predmeta ratnih

zločina, imajući u vidu da je određeni broj osumnjičenih osoba u predmetima kategorije II nedostupan pravosuđu Bosne i Hercegovine i nalazi se na teritoriji ovih država.

Predstavnici Tužilaštva MKSJ-a su na ovom sastanku upoznati i sa organizacionim i kadrovskim promjenama u Tužilaštvu BiH, posebno sa povećanjem tužilačkih kapaciteta za rad na predmetima ratnih zločina, koji će rezultirati povećanjem efikasnosti u njihovom rješavanju.

Zvaničnici Tužilaštva BiH su izrazili zadovoljstvo uzajamnom uspješnom saradnjom i podrškom Tužilaštva MKSJ-a, koje neprekidno traju već 10 godina. ■



Početkom 2014. godine glavni tužilac je održao niz sastanaka sa pravosudnim zvaničnicima sa svih nivoa i iz svih krajeva Bosne i Hercegovine

Glavni tužilac Tužilaštva BiH se sastao sa glavnom tužiteljicom ZHK



Glavni tužilac Tužilaštva BiH Goran Salihović je posjetio Široki Brijeg i sastao se sa glavnom tužiteljicom Zapadnohercegovačkog kantona Vesnom Ćavar i predsjednikom Općinskog suda u Širokom Brijegu Franjom Ravlijom.

Na sastanku je razgovarano o saradnji Tužilaštva BiH i pravosudnih institucija ZHK u borbi protiv svih oblika kriminala za koje su nadležne ove pravosudne institucije. Zaključeno je da se mora jačati saradnja između pravosudnih institucija radi efikasnije borbe protiv organiziranog kriminala i korupcije, što je jedan od prioriteta na kojima insistira Evropska unija.

Jačanje kapaciteta pravosuđa za borbu protiv korupcije je jedan od prioriteta u narednom periodu, što predviđa projekat IPA 2 u okviru kojeg će se tražiti zapošljavanje dodatnih tužilaca i sudija za rad na ovoj vrsti predmeta. Jedna od tema sastanka se odnosila i na razmjenu mišljenja o vanrednom pravnom lijeku - zahtjevu za zaštitu zakonitosti, te mogućnosti vraćanja ovog vanrednog pravnog lijeka u važeće zakone.

Budući da je u Tužilaštvu BiH u toku izvođenje dokaza u jednom predmetu organiziranog kriminala na području ZHK, u kojem je ostvarena značajna saradnja sa pravosuđem tog kantona, jedna od tema sas-

tanka se odnosila i na saradnju u ovakvim predmetima.

Tužilaštvo BiH, na čelu sa glavnim tužiocem, odlučno je u jačanju saradnje i uspostavljanju kontakata sa pravosudnim institucijama u cijeloj Bosni i Hercegovini i regionu radi efikasnije borbe protiv svih vidova kriminala. Stoga će glavni tužilac i u narednom periodu nastaviti aktivnosti jačanja saradnje sa pravosudnim institucijama na svim nivoima. ■



Главни тужилац Тужилаштва БиХ посјетио Републичко Тужилаштво РС у Бањалуци

Главни тужилац Тужилаштва БиХ Горан Салиховић и замјеник главног тужиоца Божо Михајловић посјетили су Републичко тужилаштво РС у Бањалуци и састали се са главним тужиоцем Махмутом Швраком и замјеницом главног тужиоца Светланом Брковић, која је уједно и члан ВСТС-а БиХ.

На састанку је разговарано о сарадњи у процесуирању предмета ратних злочина, те просљеђивању предмета из Тужилаштва БиХ на процесуирање ентитетским тужилаштвима, у складу са Државном стратегијом за рад на предметима ратних злочина.

Тужилаштво БиХ и Републичко тужилаштво РС имају изузетно добру и колегијалну сарадњу у свим сегментима, а нарочито у раду на предметима ратних злочина.

На састанку је договорено да ће се ускоро одржати и заједнички састанак главних ентитетских тужилаца, главног тужиоца Брчко дистрикта и главног тужиоца Тужилаштва БиХ.



На састанку ће бити разговарано о убрзању динамике процесуирања предмета ратних злочина, те просљеђивању већег броја предмета мање сложености на процесуирање у ентитетска тужилаштва, што је у складу са Државном стратегијом и препорукама структуралног дијалога о реформи правосуђа. ■



Главни тужитељ Тужитељства БиХ посјетио Тужитељство ХНК

Главни тужитељ Тужитељства БиХ Горан Салиховић је са својим тимом посјетио Тужитељство ХНК у Mostaru те разговарао са Нijазом Mehmedbašićем, главним тужитељем ХНК.

Тужитељи су разговарали о активностима које подузимају у борби против криминала и пригодом успоставе владавине права, а главни тужитељ Салиховић је упознао главног тужитеља Mehmedbašićа са активностима Тужитељства БиХ на стварању заједничких тимова са UNO БиХ, по узору на USKOK у Р Хрватској.

На састанку у Mostaru је разговарано и о сарадњи Тужитељства БиХ и Тужитељства ХНК те заједничким напорима које ове институције, свака у својој надлежности, проводе на успостави владавине права у Bosni i Hercegovini.

Главни тужитељ Салиховић је о сарадњи правосудних институција разговарао и са предсједником Кантоналног суда у Mostaru Младеном Јуришићем, те предсједником Опћинског суда у Mostaru Марином Задрићем. Добра сарадња Тужитељства БиХ, Тужитељства ХНК и других правосудних институција у ХНК ће се наставити убудуће. ■

Susreti sa predstavnicima žrtava

Glavni tužilac se sastao sa predstavnicima udruženja žrtava ratnih zločina. Predstavnici žrtava su izrazili podršku Tužilaštvu BiH i regionalnoj saradnji u procesuiranju predmeta ratnih zločina



Glavni tužilac Goran Salihović se sastao sa predstavnicima Saveza logoraša Bosne i Hercegovine i Pokreta majki enklava Srebrenica i Žepa.

Na ovim sastancima je razgovarano o procesuiranju predmeta ratnih zločina u Bosni i Hercegovini, dinamici procesuiranja predmeta u budućnosti, kao i saradnji tužilaštava regiona u okviru Protokola o saradnji u procesuiranju predmeta ratnih zločina.



Predstavnici udruženja žrtava su podržali regionalnu saradnju na osnovu Protokola o saradnji, te su se interesovali za dinamiku razmjene dokaza između tužilaštava BiH i Srbije, radi procesuiranja počinilaca ratnih zločina u BiH koji se nalaze na teritoriji Srbije.

Glavni tužilac je predstavnike udruženja žrtava upoznao sa aktivnostima Tužilaštva BiH na pronalasku nestalih osoba, žrtava ratnih zločina, te povećanju dinamike rada Posebnog odjela za ratne zločine tokom 2014. godine.

Predstavnici Saveza logoraša BiH i udruženja žrtava ratnih zločina sa područja Srebrenice su izrazili snažnu podršku radu Tužilaštva Bosne i Hercegovine i provođenju protokola o saradnji između tužilaštava regiona u procesuiranju predmeta ratnih zločina.

Zaključak ovih sastanaka je razvijanje saradnje sa udruženjima žrtava ratnih zločina radi postizanja zajedničkih ciljeva, a to su procesuiranje i kažnjavanje počinilaca ratnih zločina i pronalazak posmrtnih ostataka žrtava ratnih zločina, za kojima se traga već dvije decenije. ■

Главни тужилац се састао са представницима удружења жртава ратних злочина из РС

Главни тужилац Тужилаштва БиХ Горан Салиховић, са тужиоцима из Посебног одјела за ратне злочине, састао се са представницима удружења жртава ратних злочина са подручја Републике Српске, гђом Смиљом Митровић и г. Зораном Шебезом из Удружења породица несталих бораца и цивила Семберије и Мајевице.

На састанку је разговарано о процесу тражења лица српске националности која су нестала током протеклог рата, те активностима које се у процесу тражења несталих лица требају предузети у будућности.

Приликом састанка, госпођа Митровић је главном тужиоцу уручила одређен видео материјал који се односи



на заробљавање њеног сина, за којим трага од 1995. године, а господин Шебез је уручио документацију о нестанку свог оца, на подручју Бугојна 1992. године. ■

Posjeta predstavnika udruga žrtava iz Sanskog Mosta



Predstavnici udruga žrtava ratnog zločina sa područja Sanskog Mosta posjetili su Tužiteljstvo BiH, gdje su se sastali sa dužnosnicima i tužiteljima iz Posebnog odjela za ratne zločine, koji rade na predmetima ratnih zločina na području Sanskog Mosta i okolice.

Razgovarano je o dinamici procesuiranja predmeta za ratne zločine na tom području, te procesu traženja i identifikacije nestalih, kao i poteškoćama sa kojima se tužiteljstvo susreće u radu na ovim predmetima.

Tužiteljstvo BiH ima dobre odnose sa udrugama žrtava iz svih krajeva BiH, sa zajedničkim ciljem - a to je otkrivanje i procesuiranje osoba odgovornih za počinjene ratne zločine. ■

Dužnosnici Tužiteljstva BiH sastali su se sa predstavnicima udruga žrtava sa područja Prijedora

Dužnosnici Posebnog odjela za ratne zločine Tužiteljstva BiH sastali su se sa predstavnicima udruga žrtava ratnih zločina sa područja Prijedora i okolice.

Na sastanku je razgovarano o procesuiranju predmeta ratnih zločina na području Prijedora, optužnicama koje su do sada podignute, kao i o predmetima koji su prioritetni za procesuiranje u budućnosti. Predstavnici Tužiteljstva BiH su upoznali predstavnike obitelji žrtava da su u Tužiteljstvu BiH pojačani kapaciteti u Posebnom odjelu za ratne zločine i da se uskoro očekuje imenovanje dodatnih tužitelja u okviru IPA projekta, kao i da određeni predmeti, koji se odnose na područje Prijedora, spadaju u prioritetne predmete za rad u budućnosti.

Na sastanku je razgovarano i o procesu identificiranja više stotina posmrtnih ostataka žrtava sa područja Prijedora i okolice, pronađenih u masovnoj grobnici Tomašica. Posebni odjel za ratne zločine Tužiteljstva



BiH održava intenzivnu suradnju i komunikaciju sa predstavnicima udruga žrtava ratnih zločina iz svih krajeva BiH, jer ove udruge smatra svojim partnerima u procesu otkrivanja i procesuiranja ratnih zločina počinjenih u Bosni i Hercegovini. ■

Главни тужилац се састао са представницима Института за нестала лица БиХ, Међународне комисије за нестала лица, те ОРДАТ-а и ИСИТАР-а при Амбасади САД-а у БиХ

Процес тражења и идентификације несталих лица остаје један од најважнијих приоритета Тужилаштва БиХ - истакао је на састанку главни тужилац Горан Салиховић.

У Тужилаштву БиХ је одржан састанак који се односио на процес проналаaska и идентификације лица несталих током рата у БиХ, на којем су учествовали главни тужилац Тужилаштва БиХ, челници Института за нестала лица Босне и Херцеговине, званичници Међународне комисије за нестала лица (ICMP) у БиХ, као и представници ОРДАТ-а и ИСИТАР-а при Амбасади САД-а у БиХ.

Главни тужилац је упознао учеснике састанка са појачањем капацитета Тужилаштва БиХ за рад на предметима ратних злочина те нагласио да су тражење, екshумације и идентификације несталих лица и даље један од приоритета Тужилаштва БиХ.

Главни тужилац је позвао институције БиХ и међународне организације да пруже помоћ и подршку у процесу екshумација, који је битан за рад на предметима ратних злочина јер идентификовани посмртни остаци представљају значајан доказни материјал у овим предметима, а уједно је изу-



зетно важан за породице жртава ратних злочина, које већ двије деценије трагају за посмртним остацима својих најближих.

На састанку је истакнуто и то да ће по налогу главног тужиоца сви стручни сарадници и истражиоци из Посебног одјела за ратне злочине бити укључени у рад на екshумацијама, те да се управо реализују стручне обуке особља за те задатке.

С циљем боље координације активности на терену, Тужилаштво БиХ ће одредити координатора који ће бити у контакту с осталим институцијама укљученим у процес екshумација.

Главни тужилац је истакао да је потребно повећати средства планирана за ову намјену у буџету Тужилаштва БиХ, те да институције БиХ и међународна заједница тре-

бају имати у виду овај важан процес.

Према процјенама, у БиХ се још увијек трага за посмртним остацима више од 8.000 лица, а њихов проналазак и идентификација су кључни за успостављање владавине права, мира и помирења у Босни и Херцеговини.

Сви учесници састанка су се сложили да Оружане снаге БиХ наставе пружати подршку у процесу екshумација у свим крајевима Босне и Херцеговине.

У протеклој 2013. години службеници Тужилаштва БиХ су реализовали 114 наредби за екshумације и изашли на терен 278 пута, те координисали процес екshумација и реекshумација у свим крајевима Босне и Херцеговине, а очекује се да ће у 2014. години број ових активности бити већи. ■



Predstavници Tužilaštva BiH sudjelovali na konferenciji USAID-a i Helsinškog odbora RS o metodama i sadržaju prilikom sačinjavanja tužilačkih izvještaja i informacija o radu



Na stručnoj radionici koja je održana 12. 03. 2014. godine, sudjelovali su predstavnici tužilaštava sa svih nivoa u BiH, predstavnici VSTV-a BiH, kao i predstavnici USAID projekta i Helsinškog odbora za ljudska prava Republike Srpske.

Na sastanku je razgovarano o modalitetima pisanja i određivanju sadržaja godišnjih informacija o radu koje sačinjavaju tužilaštva na svim nivoima u BiH, te prezentaciji tih dokumenata građanima i stručnoj javnosti putem web stranica institucija, kao i na druge propisane načine.

Kao predstavnici Tužilaštva BiH na radionici su sudjelovali sekretar Tužilaštva BiH Ismeta Huremović i rukovodilac Odjela za odnose s javnošću Boris Grubešić. ■



Zamjenica rukovodioca Posebnog odjela za ratne zločine sudjelovala na predstavljanju izvještaja o borbi protiv nekažnjivosti seksualnog nasilja počinjenog u proteklom ratu



Dana 03. 04. 2014. godine, u zgradi zajedničkih pravosudnih institucija BiH, Misija OSCE-a u Bosni i Hercegovini predstavila je izvještaj „*Borba protiv nekažnjivosti za seksualno nasilje u oružanom sukobu u Bosni i Hercegovini: postignuti napredak i izazovi.*“

Zamjenica rukovodioca Posebnog odjela za ratne zločine Tužilaštva BiH, tužiteljica Gordana Tadić, prisustvovala je ovoj prezentaciji na kojoj je prisutne informisala o aktivnostima Tužilaštva BiH u radu na ovim predmetima.

U izvještaju OSCE-a se analizira postignuti napredak, kao i prepreke koje se javljaju tokom sprovođenja istraga, krivičnog gonjenja i suđenja u pravosudnim institucijama BiH na državnom nivou, u predmetima seksualnog nasilja počinjenog u oružanom sukobu.

Prisutnima su se, između ostalih, obratili i ambasador Fletcher M. Burton, šef Misije OSCE-a u BiH, i Meddžida Kreso, predsjednica Suda BiH.

Ovaj izvještaj je još jedna podrška radu Tužilaštva BiH u uspostavljanju vladavine prava i naporima u procesuiranju predmeta ratnih zločina i slučajeva ratnog seksualnog nasilja u okviru predmeta ratnih zločina, kao ključnih elemenata uspostavljanja pravde i pomirenja u Bosni i Hercegovini. ■



Združene policijske akcije po nalogu Tužilaštva BiH



Po nalogu Tužilaštva BiH provedena akcija kodnog naziva „Pelegriano”. Lišeno slobode više osoba, među kojima dvije ovlaštene službene osobe

Postupajući po nalogu tužioca iz Odjela III Tužilaštva BiH, policijski službenici Agencije za istrage i zaštitu - SIPA proveli su akciju na širem području Mostara i Hercegovine, te lišili slobode više osoba i izvršili pretrase na oko 10 lokacija.

Lišeno je slobode šest osoba i izvršeni su pretrasi u općinama Mostar, Grude i Čapljina. Aktivnosti su provedene u okviru istrage o krivičnim djelima organiziranog kriminala, zloupotrebe položaja ili ovlaštenja i iznude, a među osobama lišenim slobode su i službene osobe, dva visokopozicionirana pripadnika Službe za poslove sa strancima (SPS BiH). Provodeći istragu u predmetu kodnog naziva „Pelegriano”, otkrivena je organizirana kriminalna grupa u kojoj je više osoba vršilo zloupotrebe službenog položaja i iznude koje su u vezi s boravkom i radnim statusom stranih državljana u BiH.

Osobe lišene slobode u ovoj akciji se sumnjiče da su izvršile krivična djela organizirani kriminal iz člana 250. KZ-a BiH, zloupotreba položaja ili ovlaštenja iz člana 220. KZ-a BiH i iznuda iz člana 295. KZ-a FBiH. Postupajući tužilac će u zakonskom roku ispitati osumnjičene i nakon toga će odlučiti hoće li pre-

ma Sudu BiH uputiti zahtjev za određivanje mjere pritvora. Tužilaštvo BiH nastavlja borbu protiv svih oblika kriminala, a naročito nezakonitih aktivnosti u kojima sudjeluju ovlaštene policijske osobe i drugi službenici institucija koji zloupotrebom položaja vrše krivična djela. ■



Po nalogu Tužiteljstva BiH pokrenuta združena akcija kodnog naziva „Džoker”. Izvršeni pretresi i lišenja slobode na više lokacija

Po nalogu tužitelja Tužiteljstva BiH, više desetina djelatnika policije, SIPA-e i UNO BiH je izvršilo pretrese i lišenja slobode osoba osumnjičenih za organizirani kriminal te carinske prijevare i porezne utaje u iznosu od više stotina tisuća KM, za koje je oštećen proračun Bosne i Hercegovine.

Aktivnosti su se, između ostaloga, provodile na području Sarajeva, Istočnog Sarajeva i Čelinca. Radi se o istrazi usmjerenoj na otkrivanje kaznenih djela vezanih za carinske prijevare i porezne utaje prigodom uvoza velikih količina i kontejnerskih isporuka, uglavnom tekstilne robe podrijetlom iz NR Kine.

Pretresi su izvršeni na više lokacija

i lišeno je slobode ukupno 5 osoba.

Osumnjičene osobe u ovom predmetu su pod istragom i zbog zloporabe službenog položaja, te davanja i primanja mita, dara ili drugih oblika koristi, a Tužiteljstvo BiH nastavlja aktivnosti na otkrivanju svih osoba uključenih u nezakonite aktivnosti, među kojima ima i djelatnika određenih institucija. ■



Tužilaštvo BiH uključeno u akciju kodnog naziva „Сигурност” у оквиру предмета у Посебном одјелу за организовани криминал

Тужилац Посебног одјела за организовани криминал, привредни криминал и корупцију Тужилаштва БиХ упутио је према Суду БиХ приједлог за одређивање притвора за три лица оsumњичена за кривична дјела организованог криминала.

Носилац активности на терену је Федерална управа полиције.

Оsumњичена лица, за која је затражен притвор, слободе су лишили овлаштени полицијски службеници Федералне управе полиције у сарадњи с колегама из МУП-а РС.

У оквиру ове истраге остварена је значајна сарадња са правосудним и полицијским органима Републике Аустрије.

Тужилаштво БиХ подржава координисане и заједничке полицијске акције усмјерене против свих облика криминала, ради откривања и процесуирања учинилаца кривичних дјела и стварања безбједнијег окружења за све грађане наше земље. ■

Na području Tuzlanskog kantona provedena akcija kodnog naziva „Road” na otkrivanju i sprečavanju krijumčarenja ilegalnih migranata

Po nalogu tužioca Posebnog odjela za organizirani kriminal, privredni kriminal i korupciju Tužilaštva BiH, policijski službenici SIPA-e su proveli akciju kodnog naziva „Road” na području Tuzlanskog kantona. Akcija je usmjerena na otkrivanje i krivično procesuiranje članova organizovane međunarodne kriminalne grupe koja vrši krijumčarenje stranih državljana, uglavnom sa područja Turske, preko teritorije BiH, prema SR Njemačkoj i zemljama EU.

U istražnim aktivnostima koje su provedene utvrđeno je da je međunarodna kriminalna grupa sastavljena od državljana više zemalja, među kojima su i državljani BiH, u proteklom periodu organizovala krijumčarenje osoba te na taj način ostvarila nezakonitu imovinsku korist u iznosu od više desetina hiljada KM. Postupajući tužilac koordinira aktivnosti policijskih službenika SIPA-e i lokalne policije u vezi sa lišenjima slobode i pretresima. Osumnjičene članove međunarodne kriminalne grupe, koji su državljani drugih zemalja, u okviru ove međunarodne akcije će procesuirati policija i pravosuđe zemalja u kojima se nalaze.

Nakon provođenja aktivnosti na terenu, te ispitivanja osumnjičenih,



postupajući tužilac će donijeti odluku o pokretanju prijedloga za određivanje mjere pritvora ili mjera zabrane za osumnjičene u ovom predmetu. Tužilaštvo BiH, zajedno sa policijskim i pravosudnim insti-

tucijama zemalja regiona i Evropske unije, nastavlja intenzivne aktivnosti u borbi protiv nezakonitih migracija i krijumčarenja ilegalnih migranata preko teritorije BiH, prema zemljama EU. ■



U Tužiteljstvu BiH, dana 12. 05. 2014. godine, održan je sastanak tužitelja iz Odsjeka za gospodarski kriminal Tužiteljstva BiH i ravnatelja i dužnosnika UNO BiH, na kojem su dogovorene konkretne aktivnosti na kojima će se zajednički raditi sa ciljem procesuiranja poreznih utaja i neplaćenog PDV-a. ■

У акцији Тужилаштва БиХ и МУП-а РС заплијењено око 67,5 килограма опојне дроге марихуана „сканк“. Лишено слободе 13 лица, држављана БиХ и Црне Горе. Тужилаштво БиХ предложило одређивање мјере притвора за 7 лица

У координисаној акцији проведеној под надзором тужиоца из Посебног одјела за организовани криминал, привредни криминал и корупцију Тужилаштва БиХ, полицијски службеници МУП-а РС, у сарадњи с полицијским службеницима из кантоналних МУП-ова у Федерацији БиХ, открили су и заплијењили кријумчарену испоруку од око 67,5 килограма опојне дроге марихуана „сканк“.

Запљена је извршена у околини Берковића, а кријумчари дроге су пружили отпор, након чега су у брзој акцији савладани, стављени под контролу и лишени слободе. Извршени су претреси на више локација у БиХ, а слободе је лишено 13 осумњичених лица са подручја Тузле, Кључа, Невесиња, Гацка и Требиња. Међу осумњиченима лишеним слободе су и тројица држављана Црне Горе, од којих се један, према процјени полицијских и безбједносних органа Црне Горе и земаља региона, сматра за једног од највећих кријумчара опојне дроге у Црној Гори.

Заплијењена количина опојне дроге марихуана „сканк“ би на илегалном наркотржишту представљала око 67.000 појединачних доза, те достиже цијену од неколико стотина хиљада КМ.

У овом предмету је остварена значајна међународна сарадња с

правосуђем и полицијом Црне Горе и Аустрије, гдје је у ранијем периоду у истом предмету лишено слободе 9 лица. Проведена акција у оквиру које су вршене одређене активности на подручју Републике Аустрије носи кодни назив „Маестрал“. Ова акција показује одлучност Тужилаштва БиХ и полицијских агенција наше земље да се супротставе међународним организованим криминалним групама које кријумчаре велике количине наркотика.



Главни тужилац Тужилаштва БиХ је одредио да у Тужилаштву БиХ ванредно раде чак три тужилачка тима из Посебног одјела за организовани криминал, привредни криминал и корупцију, састављена од тужилаца, стручних сарадника, истражилаца и дактилографа, тако да су у периоду од 24 часа сви осумњичени били испитани.

Након испитивања осумњичених лица, тужилац Посебног одјела за организовани криминал, привредни криминал и корупцију Тужилаштва БиХ је упутио

приједлог за одређивање мјере притвора за 7 лица.

Мјера притвора предложена је због постојања опасности од бјекства осумњичених, међу којима има и држављана Црне Горе, опасности да би боравком на слободи могли ометати истрагу, прикривати доказе или вршити утицај на свједоке или саучеснике, као и опасности да би могли поново учинити кривично дјело.

За 6 осумњичених су, у складу са законом, предложене мјере забране које предвиђају забрану напуштања боравишта, забрану састајања са свједоцима и осумњиченима у предмету, као и периодично јављање у надлежну полицијску управу.

Тужилаштво БиХ, заједно са агенцијама за провођење закона из БиХ, земаља региона и Европске уније и у будућности ће предузимати интензивне активности у борби против међународног организованог криминала ради успостављања владавине права и што безбједнијег окружења за живот свих грађана Босне и Херцеговине. Тужилаштво БиХ наставља интензивну истрагу у овом предмету у правцу подизања оптужнице. ■



Glavni tužitelj Tužiteljstva BiH sastao se sa veleposlanikom Sjedinjenih Američkih Država za pitanja ratnih zločina

Veleposlanik Sjedinjenih Američkih Država za pitanja ratnih zločina NJ. E. Stephen Rapp, sa svojim suradnicima, posjetio je Tužiteljstvo BiH i sastao se sa glavnim tužiteljem Goranom Salihovićem i njegovim suradnicima.

Na sastanku je razgovarano o aktivnostima i naporima Tužiteljstva BiH u oblasti procesuiranja predmeta ratnih zločina, te jačanju kapaciteta radi što učinkovitijeg procesuiranja ovih predmeta.

Teme sastanka su se odnosile i na suradnju Tužiteljstva BiH sa entitetskim tužiteljstvima i Tužiteljstvom Brčko distrikta u procesuiranju manje složenih predmeta koji su prosljeđeni na rad entitetskim pravosudnim institucijama.

Glavni tužitelj je upoznao veleposlanika Rappa sa rezultatima Tužiteljstva BiH u 2013. godini, koji su i u segmentu predmeta ratnih zločina najbolji u proteklih 10 godina postojanja Tužiteljstva BiH.

Na sastanku je razgovarano i o aktivnostima preseljenja Tužiteljstva BiH u zasebnu zgradu s odgovara-

jućim kapacitetima za smještaj svih uposlenika.

Glavni tužitelj Salihović je istakao da će u ovoj godini rezultati biti još bolji jer je povećan broj tužitelja u Posebnom odjelu za ratne zločine. Intenzivno će se provoditi proces ekshumacija i identifikacija žrtava ratnih zločina, što je vrlo bitan segment u procesuiranju ovih pred-

meta, a što je posebice važno za obitelji žrtava, koje već 20 godina tragaju za svojim najbližima.

Veleposlanik Rapp je iskazao potporu Tužiteljstvu BiH u procesu uspostave vladavine prava, te jačanju suradnje u regiji radi što učinkovitijeg procesuiranja predmeta ratnih zločina. ■



Delegacija Velike Britanije posjetila Tužilaštvo i Sud BiH. Iskazana podrška Tužilaštvu BiH u uspostavi vladavine prava

U okviru navedene posjete, pravosudne institucije BiH je posjetila i specijalna predstavnik UNHCR-a, Angelina Jolie, koja je aktivno uključena u aktivnosti prevencije seksualnog nasilja u ratnim konfliktima.

Delegacija zvaničnika iz Velike Britanije, koju je predvodio ministar vanjskih poslova William Hague, posjetila je pravosudne institucije BiH i sastala se sa glavnim tužiocem Goranom Salihovićem i tužiocima iz Posebnog odjela za ratne zločine.

Zvaničnici Tužilaštva BiH su upoznali posjetioce sa historijom Tužilaštva BiH i dosadašnjim rezultatima u procesuiranju predmeta ratnih zločina.

Predstavnici Tužilaštva BiH su iskazali zahvalnost Vladi Velike Britanije za pomoć i podršku u procesu reforme pravosuđa i jačanju kapaciteta pravosudnih institucija Bosne i Hercegovine.

Delegacija Velike Britanije je pružila podršku Tužilaštvu BiH u jačanju vladavine prava i naporima u procesuiranju predmeta ratnih zločina i slučajeva ratnog seksualnog



nasilja u okviru predmeta ratnih zločina, kao ključnih elemenata uspostave pravde i pomirenja u Bosni i Hercegovini.

Iskazana je jasna podrška nezavisnosti pravosuđa i jačanju kapaciteta pravosudnih institucija radi procesuiranja i kažnjavanja počinioca ratnih zločina i drugih krivičnih djela, te stvaranja sigurnijeg okruženja za život svih građana Bosne i Hercegovine. ■



Главни тужилац се састао и разговарао са амбасадором Републике Румуније у БиХ



Амбасадор Републике Румуније у БиХ, Њ. Е. Филип Теодореску, заједно са замјеником шефа мисије Амбасаде Румуније, др Дорином Попескуом, посјетио је Тужилаштво БиХ и разговарао са главним тужиоцем Тужилаштва БиХ, Гораном Салиховићем.

Главни тужилац је упознао амбасадора са досадашњим радом и активностима те плановима за јачање капацитета Тужилаштва БиХ у будућности.

Салиховић је истакао да Тужилаштво БиХ предузима одлучне активности у процесу успостављања владавине права у БиХ те да је спремно да се супротстави свим облицима криминала, као

и да се одупре свим притисцима и уплитању политике у рад Тужилаштва БиХ.

Приоритети у раду Тужилаштва БиХ ће у наредном периоду бити предмети ратних злочина, организованог криминала и корупције. Посебну пажњу ће обратити на борбу против корупције која је у фокусу Европске уније - истакао је главни тужилац Салиховић.

Амбасадор Теодореску је рекао да Влада Републике Румуније подржава успостављање владавине права у Босни и Херцеговини, јачање капацитета и независности правосуђа засноване на европским стандардима, те независан

процес избора судија и тужилаца, што су битни сегменти у процесу европских интеграција наше земље. Такође је додао да је важно да у друштву постоји свијест о потреби за поштовањем закона и пружањем подршке владавини права.

На састанку је договорено да ће представници Тужилаштва БиХ учествовати на специјалистичкој обуци и едукацији за рад на предметима корупције и одузимања незаконито стечене имовинске користи која ће се обавити у Румунији, с обзиром да је правосуђе Румуније у протеклом периоду остварило значајне помаке и резултате на овом пољу. ■



Главни тужилац Салиховић у посјети сједишту Међународног повјеренства за нестале особе (ICMP) у БиХ, дана 06. 05. 2014. године



Glavni tužitelj Tužiteljstva BiH i predsjednica Suda BiH sastali su se sa izaslanstvom Velike Britanije

Glavni tužitelj Tužiteljstva BiH Goran Salihović, zajedno sa predsjednicom Suda BiH Meddžidom Kreso, sastao se sa izaslanstvom pravosudnih institucija Velike Britanije na čelu sa Simonom Hughesom, ministrom pravde i građanskih sloboda Ujedinjenog Kraljevstva Velike Britanije i Sjeverne Irske.

Tijekom sastanka glavni tužitelj je istakao važnost neovisnosti pravosuđa i neuplitanja politike putem donošenja nepovoljnih zakona na kojima se zasniva

nadležnost Tužiteljstva i Suda BiH, kao i zakona koji uređuju status sudaca i tužitelja u pravosuđu.

Naglasio je i to da je prioritet Tužiteljstva BiH borba protiv korupcije, organiziranog kriminala i rješavanje predmeta ratnih zločina.

Simon Hughes je rekao da je ključno održati pravosuđe neovisnim, te da će Velika Britanija, zajedno sa EU, nastaviti sa pružanjem potpore neovisnom pravosuđu. ■





Delegacija Evropske komisije posjetila Tužilaštvo BiH

Glavni tužilac Tužilaštva BiH Goran Salihović sastao se sa delegacijom Evropske komisije, koju je predvodila Paola Pampaloni, šefica Odjela za BiH unutar Direkcije Evropske komisije za proširenje.

Glavne teme sastanka odnosile su se na nastavak strukturalnog dijaloga o reformi pravosuđa, te tematske sjednice koje se trebaju održavati prije nastavka strukturalnog dijaloga.

Predstavnici Evropske komisije su iskazali podršku Tužilaštvu BiH u naporima na uspostavi vladavine prava te aktivnostima koje tužilaštvo preduzima kako bi efikasnije procesuiralo predmete ratnih zločina, korupcije i organiziranog kriminala. Također, iskazana je podrška i aktivnostima na jačanju regionalne saradnje između tužilaštava u zemaljama regiona.

Glavni tužilac se zahvalio predstavnicima Evropske komisije na

podršci u procesu uspostave vladavine prava u Bosni i Hercegovini. Također je upozorio predstavnike Evropske komisije na pokušaje političkih pritisaka koji su vrlo štetni za pravosuđe i Bosnu i Hercegovinu, a koji se dešavaju u okviru prijedloga Zakona o Tužilaštvu BiH, Zakona o plaćama i drugim naknadama u sudskim i tužilačkim institucijama na nivou Bosne i Hercegovine, te Zakona o VSTV-u BiH i Zakona o Sudu BiH.

„Putem određenih aktivnosti se pokušava vršiti pritisak na tužioce, preko plata i naknada, a također, vrlo su negativne intencije da se političke strukture upliću u način izbora tužilaca u BiH. Izbor tužilaca mora biti politički neovisan, a Zakon o Tužilaštvu BiH i Zakon o VSTV-u BiH uopšte nisu zakoni o kojima je predviđeno da se razgovara u okviru strukturalnog dijaloga“ - istakao je glavni tu-

žilac, te pozvao Evropsku komisiju i strukture EU da zaštite nezavisnost pravosuđa u Bosni i Hercegovini, što su predstavnici Evropske komisije i podržali.

Gđa Pampaloni je upoznala glavnog tužioca da je u središtu interesovanja Evropske komisije proces reforme pravosuđa u BiH, te da Evropska komisija prati aktivnosti koje se odnose na saradnju u okviru protokola o saradnji u procesuiranju predmeta ratnih zločina, koji su potpisani između BiH, Srbije i Hrvatske.

Glavni tužilac Salihović je istakao da Tužilaštvo BiH u ovoj godini nastavlja intenzivne aktivnosti u borbi protiv organiziranog kriminala i korupcije, kao i napore za efikasnije procesuiranje predmeta ratnih zločina, te naglasio da je regionalna saradnja jedan od ključnih elemenata za efikasno procesuiranje predmeta međunarodnog kriminala. ■

Главни тужилац се састао са представницом Савјета Европе у БиХ. Исказана подршка активностима Тужилаштва БиХ у предмету везаном за спровођење одлуке „Сејдић-Финци”

Главни тужилац Тужилаштва БиХ, Горан Салиховић, састао се са шефицом Канцеларије Савјета Европе у БиХ, Мери Ен Хенеси.

Централна тема разговора односила се на предмет везан за спровођење Одлуке Европског суда за људска права у предмету „Сејдић-Финци”, на којем ради Тужилаштво БиХ.

Главни тужилац је упознао гђу Хенеси са активностима које Тужилаштво БиХ предузима у овом предмету, те појаснио да се оне не односе на политички аспект провођења одлуке, него да се настоји утврдити да ли неко с умишљајем опструира имплементацију одлуке, што представља кривично дјело.

Шефица Канцеларије Савјета Европе у БиХ је изразила захвалност Тужилаштву БиХ јер преду-

зима активности у циљу имплементације ове одлуке, што представља врло битан сегмент напретка Босне и Херцеговине у правцу европских интеграција.

На састанку су истакли да се спровођењем ове одлуке крше људска права грађана у Босни и Херцеговини, те угрожава предстојећи изборни процес.

Закључак састанка је да све институције у БиХ морају поштовати одлуке Европског суда за људска права, што је и законска обавеза.

Салиховић и Хенеси су разговарали и о предметима који се односе на спровођење одлука Уставног суда БиХ, на којима ради Тужилаштво БиХ, којем је исказана подршка у процесуирању ових предмета, а разговарали су и о ситуацији која је настала на-



кон пресуде „Мактоуф-Дамјановић” и поступања Уставног суда БиХ и Суда Босне и Херцеговине након ове одлуке.

Главни тужилац је истакао да све институције у БиХ морају поступати у складу са законом и уз поштовање жртава ратних злочина, те да се морају предузети све активности да се ова ситуација успјешно разријеши и спријечи настајање оваквих ситуација у будућности. ■



Glavni tužitelj se sastao i razgovarao sa veleposlanikom Češke Republike u Bosni i Hercegovini

Veleposlanik Češke Republike u BiH, Nj. E. Tomaš Szunyog, posjetio je Tužiteljstvo BiH i razgovarao sa glavnim tužiteljem Tužiteljstva BiH, Goranom Salihovićem.

Glavni tužitelj je upoznao veleposlanika sa dosadašnjim radom i aktivnostima te planovima za jačanje kapaciteta Tužiteljstva BiH u budućnosti.

„Tužiteljstvo BiH je u 2013. godini podiglo optužnice protiv 469 osoba, što je najveći broj optuženih osoba u povijesti Tužiteljstva BiH, a koji je čak za 30% veći u odnosu na 2012. godinu“, istakao je u razgovoru glavni tužitelj Salihović.

Glavni tužitelj je istakao da Tužiteljstvo BiH, zajedno sa policijskim agencijama i agencijama za provedbu zakona u BiH, poduzima odlučne aktivnosti u procesu uspostave vladavine prava u BiH, te da je tužiteljstvo spremno da se suprotstavi svim oblicima kriminala, naročito međunarodnim oblicima kriminala, koji su u nadležnosti Tužiteljstva BiH.

„Prioriteti u radu Tužiteljstva BiH u narednom razdoblju će biti predmeti ratnih zločina, organiziranog kriminala i korupcije“ - istakao je glavni tužitelj Salihović.



Veleposlanik Szunyog je glavnog tužitelja upoznao sa planiranim dolaskom eksperata iz Agencije za razvoj iz Češke Republike, institucije koja pomaže razvoj kapaciteta institucija, među kojima i pravosudnih, a koji su izrazili želju da uskoro posjete i Tužiteljstvo BiH.

Veleposlanik Szunyog je rekao da Vlada Češke Republike podržava proces uspostave vladavine prava u Bosni i Hercegovini kao bitan segment u procesu europskih integracija naše zemlje.

„Vlada Češke je pomagala i u bu-

dućnosti će pomagati jačanje kapaciteta pravosuđa i agencija za provedbu zakona u Bosni i Hercegovini, kao i neovisnost pravosuđa“ - istakao je veleposlanik Szunyog.

Veleposlanik je istakao da podržava neovisnost pravosuđa zasnovanu na europskim standardima, te neovisan proces izbora sudaca i tužitelja.

Na sastanku je razgovarano i o mogućnostima zajedničke suradnje tužiteljskih institucija iz Bosne i Hercegovine i Češke Republike. ■





Glavni tužitelj se sastao sa komesarom Međunarodnog povjerenstva za nestale osobe (ICMP)

Veleposlanik Knut Vollebaek, komesar Međunarodnog povjerenstva za nestale osobe (ICMP), posjetio je Tužiteljstvo BiH i sastao se sa glavnim tužiteljem Goranom Salihovićem.

Na sastanku je razgovarano o procesu traženja i identifikacije osoba nestalih tijekom rata u BiH.

S obzirom da se u našoj zemlji traga za još oko 7.000 nestalih osoba, te da je pronalazak i identifikacija nestalih vrlo važan proces i dokazni materijal u predmetima ratnih zločina, glavni tužitelj je istakao da institucije u BiH moraju uložiti maksimalne napore u ovom segmentu, te da je potrebna pomoć međunarodne zajednice.

Glavni tužitelj je upoznao veleposlanika Vollebaeka sa jačanjem kapaciteta Tužiteljstva BiH, naročito u Posebnom odjelu za ratne zločine, te da se u ovoj godini očekuju bolji rezultati u procesuiranju predmeta ratnih zločina. Također, istakao je da Tužiteljstvo ulaže maksimalne napore prigodom ekshumacije, pronalaska i identifikacije nestalih osoba, te da je Tužiteljstvu potrebna pomoć međunarodne zajednice u ovom procesu.

Veleposlanik Vollebaek i ravnateljica ICMP-ja u BiH Kathrynne Bomberger su istakli da su u BiH do sada pronađene i identificirane oko 23.000 od ukupno oko 30.000 nestalih osoba, što je ogroman obavljeni posao u ovom segmentu, te da će se aktivnosti traženja i identifikacije nestalih osoba nastaviti i ubuduće.



Predstavnici ICMP-ja u BiH su istakli da će se ove aktivnosti nastaviti provoditi radi realizacije ekshumacija naročito kompliciranih i velikih masovnih grobnica i što brže identifikacije pronađenih posmrtnih ostataka.

Istaknuto je da su aktivnosti u svezi s pronalaskom i identifikacijom žrtava iz masovne grobnice Tomašica u proteklm mjesecima zahtijevale veliki angažman Tužiteljstva BiH i ICMP-ja u BiH, što je primjer nji-

hove aktivne suradnje i požrtvovanosti u ovom poslu.

Na sastanku je razgovarano i o procesu revizije posmrtnih ostataka u 11 mrtvačnica, od kojih je revizija završena u Mostaru i Nevesinju, a trenutno se radi u Goraždu, nakon čega će se pristupiti reviziji preostalih 8 mrtvačnica, uključujući Visoko i Tuzlu, gdje se nalazi najveći broj posmrtnih ostataka.

U ovom procesu, koji će se aktivno obavljati u narednom razdoblju, bit će potrebna velika pomoć međunarodne zajednice kako bi se izvršila identifikacija pronađenih posmrtnih ostataka.

Na sastanku je istaknuto i to da će se pokušati doći do novih lokacija masovnih grobnica u BiH uz pomoć satelitskih snimaka.

Dužnosnici ICMP-ja su iskazali potporu Tužiteljstvu BiH u naporima za uspostavu vladavine prava te procesuiranju predmeta ratnih zločina, kao i aktivnostima vezanim za proces ekshumacija na terenu i identifikaciju nestalih osoba, u kojima djelatnici Tužiteljstva BiH svakodnevno sudjeluju na više lokacija, u svim krajevima Bosne i Hercegovine. ■

Dnevni list

Salihović na sastanku s Rappom

Glavni tužitelj veleposlanika SAD-a upoznao s rezultatima

Veleposlanik SAD-a za pitanja ratnih zločina Stephen Rapp sa svojim suradnicima posjetio je Tužiteljstvo BiH i sastao se s glavnim tužiteljem Tužiteljstva BiH Goranom Salihovićem i suradnicima glavnog tužitelja. Na sastanku je razgovarano o aktivnostima i naporima Tužiteljstva BiH u oblasti procesuiranja predmeta ratnih zločina, te jačanju kapaciteta Tužiteljstva BiH, zbog što učinkovitijeg procesuiranja ovih predmeta. Teme sastanka odnosile su se i na suradnju Tužiteljstva BiH s entitetskim tužiteljstvima i Tužiteljstvom Brčko Distrikta, u procesuiranju manje složenih predmeta koji su proslijeđeni na rad entitetskim pravosuđima. Glavni tužitelj upoznao je veleposlanika s rezultatima Tužiteljstva u 2013. godini koji su najbolji od osnutka.



Dnevni avaz

Komisija za nestale



Salihović: Ubrzati proces pronalaska i identifikacije

Posjeta Gorana Salihovića

▶ Glavni tužilac Tužilaštva BiH Goran Salihović posjetio je sjedište Međunarodne komisije za nestale osobe (ICMP) u Sarajevu da bi razgovarali, između ostalog, o mogućnosti ubrzanja pronalaska i identifikacije nestalih osoba kao bitnog segmenta uspostave vladavine prava u BiH, saopćeno je iz Tužilaštva BiH. Tokom posjete sjedištu ICMP-ja u BiH Salihović se sastao s upravnicom Ketrin Bomberger (Kathrine), šefom programa za zapadni Balkan Metjuom Holidejom (Matthew Holiday) i drugim uposlenicima komisije.

Press

PRIVODENJE Vozio pijan i vređao policiju

ORALJE - Policija iz Orasja obavila je i pretrebu muškarca sa inicijalima B. Č. (40) iz ovog grada zbog sumnje da je u utorku (10. juna) pijan počinio kaznjivi prekršaj i vređao policiju. Nakon što je prekršaj izvršio, B. Č. je pokušao pobjeći, ali ga je policija uhapsila. Nakon što je uhapšen, B. Č. je priznao da je bio pijan i da je vređao policiju. On je pušten uz obavezu da se javi na saslušanje u naredna 24 sata.

UTAJA Kinezi namirio štetu

SARAJEVO - Državljani Kineza Sun Dongchuan (45), koji je pored sudara BiH suduđen za povratni utajac, naknadno je isplatio 554.717 maraka za povratni utajac. Sun Dongchuan je uhapšen u januaru 2013. godine zbog sumnje da je povratni utajac. On je pušten uz obavezu da se javi na saslušanje u naredna 24 sata.

NEGIRAO KRIVICU Davor Elze



Ogledao Materu Anđelina

Davor Elze (35) i Milica Veselić (36), oboje iz Orasja, članovi kriminalne grupe Davor Elze, predali su veći dio predmeta (ICMP) u Sarajevu da bi razgovarali, između ostalog, o mogućnosti ubrzanja pronalaska i identifikacije nestalih osoba kao bitnog segmenta uspostave vladavine prava u BiH, saopćeno je iz Tužilaštva BiH.

Davor Elze, koji je stariji brat Davora Elze, na granici između Srbije i BiH dolazio je policije u ponedjeljak oko 11.30 časova. Nakon uvida u dokumente, ličen je slobode i jače je preduzeto u nadležnost Suda BiH pred kojim je negirao krivicu po optužnici o predmetu "Tufila". Veselić, koji je državljanin Crne Gore, na granici prešao Karakaj dolazio je jače jutro oko 6.30 časova. I on je posle ispitivanja pušten uz obavezu da se javi na saslušanje u naredna 24 sata.

Danas sudića odluka

Na odluku za ispitivanje o krivici sprovedeno je da je Davor Elze godinama živio u Beogradu za ispitivanje i trije mjesecima dnev. Pored toga ima drugo državljanstvo, Srbije i BiH, godinama je bio nedostupno, ovdješnje pravosuđe, zbog čega je na njem raspisana potjernica kojom mu je izmijenjena adresa i mjesto privremeno. Međutim, na saslušanje i odmah, Tužilaštvo BiH juče je zatražilo odluku da optuženom učine pritvor i da mu izvedu mjesto boravišta i naposljetku mjesto boravišta. Kao dokazivanje oboje, Tužilaštvo BiH juče je zatražilo odluku da optuženom učine pritvor i da mu izvedu mjesto boravišta i naposljetku mjesto boravišta.

Dokazivanje krivice preduzeto da bi se utvrdilo da li je Davor Elze povratni utajac, kao što je to i Davor Elze, koji je stariji brat Davora Elze, na granici između Srbije i BiH dolazio je policije u ponedjeljak oko 11.30 časova.

Goran Salihović, glavni tužilac Tužilaštva BiH ZA KOGA RADI MINISTAR PRAVOSUDA?

- Kako sam ja čuo i kako sam razumio, ovdje ćemo imati tri suda u jednom. To je korak nazad, smatra Salihović
- Ministarstvo pravde BiH ne stavlja na dnevni red Strategiju za reformu pravosuđa, koja je preduvjet za nastavak IPA projekta i plasman oko 40 miliona eura pomoći

Razgovarala:
Amra BRKIĆ - ČEKIĆ

• **Vijeće ministara BiH ponovo je na dnevni red stavilo dopunu Zakona o Visokom sudskom i tužilačkom vijeću BiH (VSTVBH). O čemu se radi?**

Pokušaj Ministarstva pravde BiH da se raspravlja o tome na sjednici Vijeća ministara Tužilaštvo BiH oštro osuđuje. To je u izravnoj suprotnosti sa preporukama Venecijanske komisije, Evropske komisije i zaključcima Strukturalnog dijaloga u Bruxellesu. Ove su institucije već izrazile zabrinutost zbog pokušaja političke kontrole pravosuđa koji se dešavaju u BiH. Postavlja se pitanje da li ministar pravde BiH radi u interesu pravosudne zajednice ili u interesu stavljanja pravosuđa pod političku kontrolu. Porazavajuća je činjenica da Ministarstvo pravde BiH ne stavlja na dnevni red Strategiju za reformu pravosuđa, koja je preduvjet za nastavak IPA projekta i plasman oko 40 miliona eura pomoći pravosuđu u ovoj godini i čak 100 miliona eura u naredne tri godine. Zbog ugrožavanja nastavka ovog procesa već je izražena zabrinutost zvaničnog Bruxellesa.

Politička kontrola

Umjesto da se bavi ovim prioritarnim aktivnostima na evropskom putu naše zemlje, Ministarstvo pravde već u nekoliko navrata se bavi perifernim pitanjima i pokušajima da stavi pravosuđe pod političku kontrolu. Kao da neko namjerno želi da ugrozi sistem da se sudije i tužioci ne bave svojim poslom već da razmišljaju o tome da li će moći da

plate kredit. Mi to nećemo dozvoliti. Podijeliti ćemo sudbinu našeg naroda što se tiče budžeta i novca i svega, ali nećemo dozvoliti da se zbog političkih razloga ugrozi sistem. Oštro osuđujemo aktivnosti izmjene zakona o pravosuđu u koje nisu uključeni predstavnici pravosudne zajednice i dužnosnici pravosudnih institucija. O svemu ćemo svakako upoznatiti strukturu i institucije Evropske unije u BiH.

• Nedavno ste u Bruxellesu prisustvovali još jednoj rundi razgovora o reformi pravosuđa?

Sastanak je bio veoma uspješan. To je, ustvari, bila prezentacija odluke Venecijanske komisije (VK) gdje je potvrđeno ono što je struka ukazivala, a to je da izbor i imenovanje sudija i tužilaca mora biti od neovisnog tijela, što je u suštini VSTV, da je prijedlog u tom zakonu po kome VSTV imenuje i razrješava Parlament pritisk i da nije u skladu sa standardima neovisnog pravosuđa. U odluci VK-a stoji i preporuka Ministarstvu pravde da se prijedlog zakona vrati i uskladi sa standardima koji govore o imenovanju članova VSTV-a. Bilo je govora i o disciplinskoj odgovornosti sudija i tužilaca, da taj segment bude transparentniji. Također, data je podrška i preporuka za neovisni izbor sudija i tužitelja, te sprečavanje sukoba interesa u pravosudnim institucijama. Ove preporuke VK-a u svojoj odluci Evropska komisija je podržala i naložila će Ministarstvu pravde BiH da se to uskladi. Izražena je zabrinutost ako dođe do političkog pritiska.

• Sredinom maja je novi sastanak Strukturalnog

dijaloga o pravosuđu. O čemu će biti govora?

Mi iz pravosudne zajednice bismo bili sretni da na ovom dijalogu učestvujemo civilno društvo i mediji. Bit će govora o korupciji i diskriminaciji. Moramo raditi na tome. Mi ćemo sa našim kapacitetima raditi na borbi protiv korupcije onoliko koliko možemo i tu sigurno nema nedostataka.



Foto: B. KUKULIĆ

vihi, ali nećemo nikome pakovati ili bilo šta montirati bez dokaza. Da bismo bili uspješni, moramo imati saradnju civilnog sektora, medija, politike, građana... U većini slučajeva smo sami. Sami otkrivamo, pošto ljudi teško saraduju. Svi pričamo o korupciji, ali kada dođemo do prijavi, njih je jako malo. Bilo je predmeta koji su trajali po deset go-

dina, moguće da je bilo i straha... Moramo krenuti u zajednički obračun.

• U Predstavničkom domu Parlamenta FBiH usvojen je set antikoruptivnih zakona, za koji neki već kažu da neće donijeti korist. Šta Vi mislite?

Stav VK-a o Zakonu o sudovima BiH je da nije dobro da u jednom sudu imamo dva. U Sudu BiH imamo

ke svrhe. Mišljenja sam da postojeće kapacitete treba pojačati, pojačati broj tužilaca i sudija. Posla ima za sve. Sve što nam dođe pod ruku, uradit ćemo. Apelujem da se na nižim nivoima pojačaju tužilaštva, sudovi i imat ćemo efekt. Mi smo dobili nove tužioce i saradnike i svakako očekujemo rezultate. Mislim da se veliki uticaj politike pokušava napraviti i kroz nacrt zakona o plaćama sudijama i tužiocima, koji je vraćen u ponovnu proceduru. Hoće se kroz koficijente sudije i tužioce staviti u isti nivo sa državnim službenicima, a svrha reforme pravosuđa je bila u tome da sudije i tužioci, kroz lična primanja i platu, budu neovisni. Ukoliko se to desi, sudije će biti obični činovnici i bit će potpuno ovisni od vlasti.

Lutka i Zubac

Odluka Ustavnog suda se odnosila samo na topli obrok, prijevoz i odvojeni život i to je bila povreda i diskriminacija sudija i tužilaca u odnosu na sve građane. Ministarstvo pravde je predložilo ne da se to dogradi, već je išlo na to, a što nije materija ustavne odluke, da diraju plate. Protiv smo toga. Sistem će biti potpuno ugrožen ukoliko se to desi. Čovjek nekad pomisli da li to Ministarstvo pravde BiH i ministar predstavljaju pravosudnu zajednicu ili politiku, jer vidimo da se slabo slušamo. Mi možemo rasturiti ovaj sistem, ali vidjeti smo šta je VK rekao 2012. i evo sad. To su standardi koje moramo ispoštovati. Bolje je da krenemo odmah nego kasnije da se vraćamo unazad.

• Kada govorimo o predmetima ratnih zločina, porodice žrtava smatraju da se predmeti sporo rje-

šavaju. Iz Prijedora prijavljuju zbog malog broja optužnica protiv osuđenih na ovom području?

Moja politika gonjenja je malo drugačija u odnosu na ono što je iz mene. Pokušao sam napraviti drugačiju organizaciju, tako da sam pojačao broj tužilaca na područjima koja, po nama, mogu dati rezultat. U narednom periodu možemo očekivati veći broj optužnica. Već se obavljaju razgovori sa članovima porodica žrtava pronađenih u Tamašici, pojačali smo ne samo to već i sva područja.

• U Sudu BiH trenutno je u toku suđenje u predmetu Lutka?

Ponosni smo na rezultate što se tiče istrage. Imamo dobru saradnju sa evropskim institucijama, regionom... Nadam se da će ovako dobri rezultati biti i što se tiče korupcije. Imamo i predmet Kekerević i drugi, koji je najveći predmet što se tiče korupcije na ovim prostorima. Radi se o 32 miliona KM.

• Istragom koja se vodi protiv Mladena Kekerevića i drugih, a kojima je tek počelo suđenje, bio je obuhvaćen i Kemal Čaušević, nekadašnji direktor UIOBiH. Da li je ta istraga još u toku ili...?

Tu mnogo ne mogu govoriti. Radimo na tome.

• Kada će biti donesena odluka u vezi s istragom koja traje protiv Gorana Zupca, direktora SIPA, osumnjičenog da nije poduzeo sve radnje koje su mogle spriječiti napad na zgradu Predsjedništva?

Još ne znam koja će odluka biti. Znam da je istraga u završnoj fazi.

NEZAVISNE notine

Kinezi uplatio pola miliona KM

■ **SARAJEVO** - Sun Dingčuan (44), državljanin Kine optužen za poresku utaju, koji je zaključio sporazum o priznanju krivice s Tužilaštvom BiH, uplatio je 556.117 KM po osnovu nezakonito ostvarene imovinske koristi.

U saopštenju Tužilaštva BiH podsjeća se da je Dingčuan sporazumno priznao krivicu za poresku utaju ili prevaru, te prihvatio sporazum kojim se predviđa kazna zatvora u trajanju od jedne godine. (Srna)

Dnevni avaz

Do godišnjih odmora nekoliko krupnih optužnica

Kao glavni državni tužilac počinje novo tužilaštvo na krupnim predmetima, gdje utrošeno očekujemo rezultate. Mogu vam obećati da će do godišnjih odmora biti nekoliko krupnih optužnica! Također, bavit ćemo se

prosvjedima i svim onim koji ne izjavljavaju pravdu u korist sudova i tužilaštva. Znamo što pojačati aktivnosti i na prosvjedima ratnih zločina. S tim u vezi zadržali ih na vrhovnoj kolegiji u Srebrenici i Hrvatskoj.

Odluka Ustavnog suda BiH se odnosila samo na topli obrok, prijevoz i odvojeni život, ali Ministarstvo pravde BiH se usudi da ide korak dalje, što nije materija odluke Ustavnog suda. Stvara se princip "kadine te tuži, kadine ti sud". A to je ova krivi država! **• Kako komentirate činjenicu da na danomost re-**

gionu, a istovremeno ista radi i radi se na ovom polju u skladu s našim kapacitetima. Posavim, nema nedostataka, ali smo tako nešto imali: koriste, pokušati ili bilo šta montirati bez dokaza. Neće biti montirani procesi.

Oduzimanje imovine

Moćemo li iz ugla glavnog državnog tužioca čuti stav o setu antikoruptivnih zakona na federalnom nivou, oko kojih se digla velika prašina?

Moćemo li iz ugla glavnog državnog tužioca čuti stav o setu antikoruptivnih zakona na federalnom nivou, oko kojih se digla velika prašina?

Tužilaštvo BiH je u posljednjem periodu prošlo najviše rezultata kod progonjenja organiziranog kriminala. Trenutno se pred sudovima vode veliki predmeti. Dobili smo i priznanje od Sjedinih Američkih Država. Predmet "Mladen Kekerević i drugi", tužak 32 miliona KM, najveći je predmet korupcije u historiji ovog tužilaštva. Nedavno smo oduzeli imovinsku korist od 18 miliona maraka, ali to malo ko želi čuti. Naravno, da na državnim nivou imamo mehanizme, da imamo zakone koji sve to reguliraju.

Drugi o nama

PRESS CLIPPINGS

Konferencija glavnih tužitelja iz zemalja regije u Tirani

Zapaženo izlaganje glavnog tužitelja BiH Salihovića o stanju u bh. pravosuđu

SARAJEVO - Na konferenciji u Tirani, na kojoj sudjeluju glavni tužitelji iz zemalja regije i europskih zemalja, glavni tužitelj Tužiteljstva BiH Goran Salihović imao je zapaženo izlaganje u kojem je govorio o borbi protiv organiziranog kriminala, potrebi neovisnosti pravosuđa i neovisnog izbora tužitelja u BiH. Središnje teme konferencije odnosile su se na regionalnu suradnju tužitelja,

stavu, borbu protiv organiziranog kriminala s međunarodnim elementima te neovisnost glavnih tužitelja u radu kao preduvjeta za uspostavu vladavine prava i neovisnost pravosuđa. Glavni tužitelj Salihović je eminentni skup upoznao sa situacijom u pravosuđu BiH, aktivnostima Tužiteljstva BiH u borbi protiv organiziranog kriminala i korupcije, položaju glavnog tužitelja u

pravosudnom sustavu BiH te pokušajima političkog utjecaja na rad pravosuđa. U ovom je izlaganju istaknuo da Tužiteljstvo BiH nastavlja svoj rad u procesu uspostave vladavine prava i procesuiranja počinilaca kaznenih djela iz nadležnosti Tužiteljstva BiH u cilju stvaranja što sigurnijeg okruženja za život svih građana BiH u predstojećem procesu europskih integracija. NINA



**Dnevni
list**

OSLOBODENJE



Ubrzati pronalaskе i identifikacije nestalih

Tokom jučerašnje posjete sjedištu IC-MP-a u BiH, glavni tužitelj BiH Goran Salihović sastao se sa ravnateljicom Katrine Bomberger, šefom programa za zapadni Balkan Matthewom Holidayom i drugim djelatnicima povjerenstva. Glavni tužitelj je istakao da se u BiH moraju pokrenuti intenzivne aktivnosti i svakodnevni kontakti i suradnja između svih subjekata uključenih u proces traženja i identifikacije nestalih osoba, jer se radi o procesu vrlo bitnom za obitelji žrtava, kao i za istrage u predmetima ratnih zločina. Postoje podaci da u mrtvačnicama postoji najmanje oko 3.000 pronađenih, a neidentificiranih posmrtnih ostataka, čija identifikacija mora biti prioritet u narednom razdoblju, saopćeno je iz Tužiteljstva BiH.

Dnevni avaz

Komentar dana

Piše: **Miralem AŠČIĆ**

(miralema@avaz.ba)



Ko je prvi

Tužilaštvo BiH konačno kreće u obračun s milionskim dužnicima za PDV

Dužnicima skoro 300 miliona KM za PDV konačno bi se, čini se, moglo stati ukraj.

Sastanak čelnika Tužilaštva i Uprave za indirektno oporezivanje (UIO) BiH kako bi bile dogovorene posljednje aktivnosti koje će biti pokrenute radi naplate duga od velikih dužnika, dokaz je konačne spremnosti bh. institucija da se obračunaju s pojedincima i privrednim subjektima koji su godinama izbjegavali ruku pravde.

Po uzoru na hrvatski USKOK, bh. pravosudne institucije formirale su snažan tim stručnih ljudi koji će se konačno uhvatiti ukoštac s carinskim i poreznim dugovima koji su godinama pravili milionsku štetu za budžet ove države.

Tužilaštvo BiH već za narednu sedmicu najavilo je prve konkretne korake. Zatražena je istraga za prvih deset predmeta velikih poreznih dužnika, koji su, ruku na srce, već prije de-

set godina trebali biti procesuirani. No, za naplatu duga nikada nije kasno.

Pogotovo se to odnosi na 142 miliona KM ukupnih dugovanja za poreze koje su firme napravile od 1996. do 2004. godine prema entitetskim carinskim upravama. Više od polovine tih dugova odnosi se na kompanije koje su u direktnom ili indirektnom vlasništvu Lijanovića, porodice u kojoj najveći utjecaj ima federalni ministar poljoprivrede, vodoprivrede i šumarstva Jerko Ivanković Lijanović (NSRzB).

Riječ je o 72,9 miliona KM duga za koje su Lijanovići mislili da nikada neće doći na naplatu, ali su se, izgleda, prevarili.

Lijanovićima, Lučićima, Stanićima, Kekerovićima... i mnogim drugima vrijeme je odavno isteklo. Sada je samo pitanje dana kada će odgovarati za svoje višegodišnje malverzacije i utaje poreza te ko će biti prvi na redu.

SIPA uhapsila pet osoba zbog porezne utaje Oštetili budžet za više stotina hiljada maraka

Nezvanično, uhapšen Adin Subašić, koji je rukovodio grupom



Uhapšeni sprovedeni
u prostorije SIPA-e
(Foto: SIPA)

Postupajući po naredbama Suda i Tužilaštva BiH, policijski službenici Državne agencije za istrage i zaštitu (SIPA) jučer su u operativnoj akciji „Džoker“ uhapsili pet osoba zbog organiziranja kriminala.

Slobode su lišeni A. S., A. S., DŽ. Š., D. T. i I. M. zbog postojanja osnovane sumnje da su počinili krivično djelo organiziranog kriminala u vezi s krivičnim djelima:

carinska prevara, krijumčarenje, porezna utaja ili prevara, primanje dara ili drugih oblika koristi, davanje dara ili drugih oblika koristi, protivzakonito posredovanje i zloupotreba položaja ili ovlaštenja i dr.

Članovi organizirane kriminalne grupe sumnjice se da su, djelujući od 2012. do 2014. godine, prilikom kontejnerskog uvoza tekstilne i druge robe iz Kine u BiH počinili više krivičnih djela vezanih uz carinske i porezne utaje, čime je budžet BiH oštećen za više stotina hiljada KM. Nezvanično saznajemo da je među uhapšenima Adin Subašić,

kojeg istražitelji smatraju ključnom osobom koja je rukovodila ovom grupom.

Policijski službenici jučer su pretresli ukupno devet lokacija na području Sarajeva, Istočnog Sarajeva i Čelinceva, radi pronalazjenja predmeta koji mogu poslužiti kao dokaz u daljnjem postupku. Aktivnosti su realizirane u saradnji s pripadnicima Uprave za indirektno oporezivanje, Granične policije, MUP-a KS i RS. Uhapšene osobe privedene su u službene prostorije SIPA-e, nakon čega će biti predane na daljnje postupanje Tužilaštvu BiH.

M. Aš.

вечерње

НОВОСТИ

ПОДИГНУТА ОПУЖНИЦА ПРОТИВ 26 ОСОБА У ПРЕДМЕТУ „БАЛД“

ШВЕРЦОВАЛИ ЦИГАРЕТЕ

САРАЈЕВО - Туžilца Посебног одсека за организовани, привредни криминал и корупцију Туžилаштва БиХ подигао је оптужницу против укупно 26 особа у оквиру предмета „Балд“, рекла је за наш лист Адиса Карачић, портпарол Туžилаштва БиХ. Оптужени у овом предмету се терете да су, у периоду од априла 2011. до марта 2012, као организатори и чланови пет међусобно повезаних организованих група, организовано кријумчарили цигарете.

Резултати истраге су показали да су у том периоду ове организоване криминалне групе учиниле пренос и препродају 15.725 боксова цигарета, укупне вредности најмање 392.500 КМ.

У оквиру предмета кодног назива „Балд“ оптужени су: Мирослав Ракић (1970), Владислав Анђелић (1981), Мирослав Максимовић (1979), Александар Самарџић (1979), Горан Кобаш (1989), Миладин Јокић (1966), Станко Грабовач (1956), Веселин Поповић (1966), Мирослав Фолварек (1973), Петра Поњевић (1953), Драган Поњевић (1979), Емир Еминовић (1980), Милан Гргић (1978), Расим Еминовић (1951), Миленко Перић (1955), Шефик Пивић (1960), Драго Перић (1962), Радомир Ђекић (1961), Вукота Бојовић (1982), Драган Шиник (1966), Милан Самарџић (1970), Здравко Вујовић (1979), Угљеша Елчић (1962), Десимир Ивановић (1973), Мирко Пржуљ (1982) и Крсто Гашевић (1954).

Глас Српске

Туžилаштво БиХ подигло оптужницу

Прокријумчарили 71,5 килограма сканка

САРАЈЕВО - Против Драгана Дезеровића из Гацка и још девет особа које се терете да су се бавиле кријумчарењем дроге, Туžилаштво БиХ подигло је оптужницу.

Осим Дезеровића оптужени су Александар Међедовић, Алис Хашимовић, Мијомир Томанковић, Драган Савијевчић, Здравко Рачевић, Пуниша Николић, Данило Боковић, Илија Ђузић и Слободан Пашовић. Они се терете да су од новембра прошле до фебруара ове године били чланови криминалне групе која је формирана ради међународног кријумчарења марканте са подручја Црне Горе, према БиХ, затим даље до земља Европске уније. Оптужени су да су прокријумчарили 71,5 килограма сканка, чија је вредност на црној трговини више стотина хиљада марка.

Г. О.

KONTAKT TUŽILAŠTVA-TUŽITELJSTVA BOSNE I HERCEGOVINE

Tužilaštvo-Tužiteljstvo BiH
Kraljice Jelene 88
71000 Sarajevo
Bosna i Hercegovina

tel.: +387 33 707 200
fax.: +387 33 707 463
e-mail: info@tuzilastvobih.gov.ba

www.tuzilastvobih.gov.ba

Copyright
Tužilaštvo-Tužiteljstvo BiH 2014.

Dizajn: Besim Vučijak
besim.vucijak@gmail.com



Dana 03. 04. 2014. godine održan je veliki kolegij Tužiteljstva BiH, na kojem je glavni tužitelj tužiteljima i osoblju predstavio rezultate rada u prva tri mjeseca ove godine, kao i plan za povećanje broj optužnica za ratne zločine, organizirani kriminal, korupciju i druga kaznena djela iz nadležnosti Tužiteljstva BiH u 2014. godini.

